

七十二家集

梁簡文帝御製集卷之九

梁太宗簡文皇帝蕭綱著

啓

請武帝御講啓

此重雲之講

臣綱臣綸臣紀言臣聞紫宮麗天著明玄象軒  
臺在嶽逖聽良書是以道彌隆而禮愈縟德彌  
溥而事愈泰此蓋彰至治之尊牧生民之本也  
伏以大光嚴殿侔神垂則冲天開宇功深大壯  
事協文明儀辰建極切靈啓構照燭三光含超

百堵咸調心華所表復非良匠之力神通所現  
不藉子來而成實惟淨國固絕董落之禮高邁  
釋宮理無鹿鳴之宴竊惟妙勝之堂本師於茲  
佛吼摩尼之殿如來亦闡法音伏希期降降容  
施灑甘露油然慧雲霈然慈雨光斯盛業華彼  
蒼生履天居而說無相同真也建佛事而被率  
土化俗也同真化俗至矣哉一舉而三美顯豈  
不大乎與彼陁山之上僊巖之下西都鳳皇負  
陽鸞鷟安足同日而語哉敢露丹愚伏待矜遂

輕干聽覽流汗戰慄謹啓

重請御講啓

臣綱臣綸臣紀言一日輕最上聞願垂法雨天  
鑒凝遠未蒙降遂預均藥木誠同器水徒美春  
華還憐秋藿伏惟陛下德冠受圖道隆言契四  
三六五不能喻十堯九舜無以方而秋風動條  
尚興未息之念一物失所猶起納隍之仁方留  
衢室之情未議石渠之講竊以神通所現一念  
萬機大權所行應時三密猶處禪寂影現十方  
一起道場已爲八會豈與吹律之后均熊湘之

勞鑄鼎之君切風雨之務伏願以平等慧行如  
來慈爲度蒼生降希有事使朝滿一乘情皆十  
善智珠法炬人人並持四忍五明家家可望謹  
冒天威重以聞啓翹誠注仰伏希允遂使坵冀  
無山豈自高於叢目南陽廻景不獨隔於當今  
謹啓

又請御講啓

臣綱臣綸臣紀言敢藉寵靈煩干聽覽再降神  
旨未垂臨燭伏以皇政廣覃天覆悠遠海河夷  
晏日月貞明洛水有稱蕃之胡蘂街有歸命之  
虜春戈已戢秋塵不飛槐棘均多士之詩貂璫  
有得賢之頌聖德冲謙劬勞日昃猶以時多禹  
歎物未堯心百辟慚惶羣司聳蕩臣等或三善  
靡聞或一官不効嗜鮑逢宰相之請學儉得叅  
軍之譏而自以結根天苑竊高前載是以匪懼

塵蹟復敢上聞伏願樂說大慈特垂矜許放光  
動地不以法妨俗隨機逗藥不以人廢言俾茲  
含生凡厥率土心花成樹共轉六塵鏡裏得珠  
俱聞三障於其誠願孰不幸甚累冒宸嚴倍增  
戰息謹啓



奉請上開講啓

此同泰之講

臣竊言竊以真如無說非筌不悟極果不應注  
仰斯通故器有水緣方見圓臈之影藥含長性  
得墜慧雲之慈伏惟陛下玉鏡宸居金輪馭世  
應跡有爲俯存利物不違本誓開導愚蒙驅十  
方於大乘運萬國於仁壽豈止冶斤田粟功侔  
造化疏江決河削成天下智高九舜明出十堯  
頻徙鑿蹕降甘露雨天人舞蹈含生利益是以  
背流知反迷羊識歸臣自叨預趨聞渴仰無厭

多作之  
一日冒陳丹款伏希復轉法輪未廻聽卑之恩  
尚絕愚臣之願悽悽寸志重敢披祈伏願將降  
一音曲矜三請被微言於王合集妙義於寶坊  
聖心等視蒼生猶如一子遂臣之請卽是普被  
無邊如蒙允許衆望亦足兩肩荷負豈敢爲喻  
不任下願謹啓事以聞

謝上降爲開講啓

臣綱啓舍人徐儼奉宣勅旨無礙大慈不違本  
誓來歲正月開說三慧經伏奉中譚身心喜躍  
饑蒙玉膳比此未踰貧獲寶珠方斯非譬伏以  
元正慶流大裘禮畢慧雲續潤法雨仍垂出世  
洪恩與陽春而布澤俾茲含生隨藥木而增長  
惟同萬國福浹九圍豈直愚臣得未曾有謹宣  
今勅馳報綸紀具爾相趣無辭上謝謹啓

重謝上降爲開講啓

臣綱啓丹願懇誠屢冒宸宸寶希降甘露雨普  
被三千天聽孔邈未垂鑒遂旱苗傾潤豈比自  
憐鴟鳥思林寧方渴仰近因大僧正慧令伏敢  
重新降遯勅旨垂許來歲二月開金字波若經  
題殊特之恩出應愚請稽拜恭聞不勝喜躍身  
心悅樂如觸慈光手足顛舞義非餘習伏以香  
城妙說實仰神文潤方雲雨明踰日月能使迷  
途識正大夢均朝梵志懼來天魔遙禮提桓所

聽而今得聞波崙所求希世復出其爲利益深  
廣無邊九圍獲悟十方蒙曉雖復識起初流心  
窮後念方當共捐五蓋俱照一空巍巍蕩蕩難  
得爲喻臣仍屈慧今續宣此典大乘普導寔由  
聖慈伏筆罄言寧宣戴荷不任下情謹啓事謝  
聞

謝開講般若經啓

臣綱言伏承輿駕臨同泰寺開金字般若波羅  
蜜經題照迷生之慧日導出世之長源百華同  
陰萬流歸海幽顯讚揚率土含潤臣身穢已來  
望舒盈闕甘露普被人天俱萃波若魔事獨在  
微躬馳係法輪私深剋責不任下情謹奉啓奉  
承

卷之七  
答同泰寺立剎啓

竊以寶塔天飛神龕地踊豈惟昔代復見茲辰  
嘉彼百靈欣斯十善雖復紫煙旦聚比此未儔  
朱光夜上方今知陋

謝勅使監善覺寺起刹啓

臣綱啓伏見勅旨使監作舍人王曇明材官將軍沈微御仗吳景等監看善覺寺起刹事爰奉聖恩曲降神力命斯執事脩茲長表寶塔雲構無待喜園水精特進非差龍海大龜持泥未足爲盛鶩鶩引繩方斯取埒仰瞻慈渥喜戴不勝俯循宿願私增涕噎不任銘荷謹奉啓謝聞



謝御幸善覺寺看剎啓

臣綱言卽日輿駕幸善覺寺威神所被金表建  
立槃泰清而特起接庫樓而上征旣等湛然長  
均淨土方爲佛事永利天人頂荷之誠臣百恒  
品不任下情謹奉啓事謝聞

謝勅資銅供造善覺寺塔露盤啓

臣綱啓主書陳僧聰奉宣勅旨垂資銅一萬三千斤供造善覺寺塔靈盤是稱邛陽之珍寶亦昆吾之珩燥濕無變九布見奇寒暑得宜六律咸用況復神龍負子光斯妙塔金鳥銜帶飾茲高表函谷匪其詠歌臨淄愿其祥應陽燧含景還譬月輪甘露入盤足稱天酒辭林本闕心辯又慙徒戴重恩終難陳謝不任銘荷之誠謹奉啓聞

謝勅賚栢剎柱并銅萬斤啓

臣綱啓傳詔呂文強奉宣勅旨賚臣栢剎柱一  
口銅一萬斤供起天中天寺九牧貢金千尋挺  
樹承曜梵輪方興寶塔夏蓋神鼎晉忍相風使  
福被域中功裨無外臣以庸愚稟承勝善樂受  
遍心思光動色銘荷之誠無詞啓謝不任頂戴  
謹奉啓謝聞

謝勅資錢并白檀香克法會啓

臣綱啓傳詔奉宣勅旨以臣明法會垂資錢二十萬白檀薰陸窠香各十斤黃紙詔書先開泉府青雲好氣次集桂宮貨重文龜芳踰麗草散金廡下止及軍吏積穀充家纔班親族未若資此良田方開五蓋入茲法度長出四流假詞敬祖尚慙難述借辯君卿猶知非謝不任荷戴謹啓事以聞

謝勅賚苦行像并佛跡啓

臣綱啓舍人顧虔奉宣勅旨以金銅苦行佛并  
佛跡俱養具等賚使供養伏以六年道樹超出  
四魔千輻足輪德圓萬善故能聞見悟解逢遇  
祛塵天聽恩隆曲垂獎被謹脩飾欄宇齋潔身  
心翹仰慈光伏待昭降千唱四辯尚不宣心輕  
毫弱簡豈能陳謝不任下情謹啓事謝聞

奉阿育王寺錢啓

臣綱言臣聞八國同祈事高於法本七區皆蘊  
理備於湧泉故牙牀白繖無因不覩金瓶寶函  
有緣斯出伏惟陛下懸天鏡於域中運大權於  
宇內三有均夢則臨之以慧日百藥同枯則潤  
之以慈雨動寂非已行住因物無能名矣臣何  
得而稱焉故以照光赤書則前史之爲瑞珥芝  
景玉嗤往代之爲珍難遇者乃如來真形舍利  
照景密瓶浮光德水如觀鈎鎖似見龍珠自非

聖德威神無以值斯希有天人頂戴遐邇歸心  
伏聞阿育王寺方須莊嚴施用萬金檀豐十藏  
寶陳河府泉出水衡比丘持土大廈方構羅漢  
引繩高塔將表不勝喜抃謹上錢一百萬雖誠  
等散華心荷不盡而微均滴瀝陋甚隣空輕以  
塵聞伏啓懷汗謹啓

謝勅賜解講錢啓

無勞礪石之火金貨猥臻非遶玉壘之川銅山  
可見舒王濟之埒猶覺有餘假劉寔之繩穿而  
不盡慧輪究竟爰降曲私福田成滿仰由慈被  
榮光獨照自均若木負恩知重竊譬蓬萊



謝賜錢啓

殊澤隆厚造次被蒙重彼八珠珍斯九法赤仄  
成采出自水衡之藏紺文委貫忽積銅弼之裏  
謹長克放生用濟含識發弘誓願等供無邊效  
彼薄拘均茲流水方便怖鴿獲安窮魚永樂

謝賚納袈裟啓四首

臣綱啓殿師吳苗奉宣勅旨垂賚鬱泥細納袈  
裟一緣分同妙葉界寫長脰拂石慙華裁金非  
重是日新染厥惟田服方便幽貞芳杜耻緝芙  
蓉仙客排雲羞裳飛羽穢食凡軀無明暗識叨  
恩每重荷澤難勝不任銘戴之至謹奉啓事謝  
聞

又

臣綱啓蒙賚鬱泥納袈裟一緣荀鍼秦縷因製

緝而成文魯縞齊紩藉馨漿而受彩初開篋笥  
便觀舍衛田疇不出戶庭坐視南山塋陌竊以  
三銖輕輓稱美服於淨居千金巨麗得受用於  
迦葉而湛恩特被萃此愚躬霜降授衣曲澤便  
及喜溢心崖如從空中所墜忽不自知更謂寶  
支所出采襖四色事非離世鉤蘭兩葉殊澤實  
隆不任荷戴之至謹啓事謝聞

又

臣綱啓宣傳左右俞景茂奉宣勅旨垂賚鬱泥

真納九條袈裟一緣精同織縷巧均結垂邁彼  
良疇成斯妙服雖復貴比千金輕踰二兩無以  
匹此洪恩方斯殊賚臣卧疾累旬未堪行踐不  
獲卽被新染陪侍寶坊塵緣穢體愧荷相集不  
任慙悚之至謹啓事謝聞

又

蒙賚鬱金泥細衲袈裟一緣忍辱之鎧安施九  
種功德之衣慚愧八法

謝勅聽從舍利入殿禮拜啓

臣網啓舍人王景曜至奉宣敕旨曲垂逮問并  
聽臣隨從舍利入殿禮拜謹奉秋色照澄預表  
光瑞臣比身心得無障惱明陪扈寶函謹鞠躬  
恭到但不生羽翼無假神通身升淨土高排閭  
闔足踐蓮華方茲非喻行躡寶梯比斯未重誘  
導殊恩實廻始望顧茲塵縛喜戴不勝謹啓

謝敕使入光嚴殿禮拜啓

臣綱啓舍人王景曜奉宣敕旨曲垂勞問并使  
明入光嚴殿禮拜法身謹奉臣粗蒙恩造明守  
開恭到遂以勞屢升淨土風積水厚不足爲喻  
微心悚躍上謝無辭不任下情謹啓事謝聞

謝勅爲建涅槃懺啓

臣網啓伏聞勅旨垂爲臣於同泰寺瑞應殿建  
涅槃懺臣障難多災身穢饒疾鍼艾湯液每贖  
天覽重蒙曲慈降斯大福冀慧雨微垂卽滅身  
火梵風纔起私得清涼無事非恩伏枕何答不  
任下情謹奉啓謝聞

謝勅叅迎佛啓

臣綱啓主書周昂奉宣勅旨曲賚恩叅臣卽爾  
到建元寺奉候法身金山戾止王人勞問榮恩  
頗疊啓謝無辭不任下情謹啓事謝聞



梁簡文帝御製集卷之十

梁太宗簡文皇帝蕭綱著

書

答湘東王和受試詩書

吾輩亦無所遊賞止事披閱性既好文時復短  
詠雖是庸音不能閣筆有慙伎癢更同故態比  
見京師文體懦鈍殊常競學浮疎爭爲闡緩玄  
冬脩夜思所不得既殊比興正背風騷若夫六  
典三禮所施則有地吉凶嘉賓用之則有所未

聞吟詠情性反擬內則之篇操筆寫志更摹酒  
誥之作遲遲春日翻學歸藏湛湛江水遂同大  
傳吾旣拙於爲文不敢輕有倚撫但以當世之  
作歷方古之才人遠則揚馬曹王近則潘陸顏  
謝而觀其遺辭用心了不相似若以今文爲是  
則古文爲非若昔賢可稱則今體宜棄俱爲盍  
各則未之敢許又時有效謝康樂裴鴻臚文者  
亦頗有惑焉何者謝客吐言天拔出於自然時  
有不拘是其糟粕裴氏乃是良史之才了無篇

什之美是爲學謝則不屈其精華但得其冗長  
師裴則蔑絕其所長惟得其所短謝故巧不可  
階裴亦質不宜慕故胸馳臆斷之侶好名忘實  
之類方分肉於仁獸逞卻克於邳鄆入鮑忘臭  
效尤致禍決羽謝生豈三千之可及伏膺裴氏  
懼兩唐之不傳故玉徽金銑反爲拙目所嗤已  
人下里更合郢中之聽陽春高而不和妙聲絕  
而不尋竟不精討錙銖覈量文質有異巧心終  
愧妍手是以握瑜懷玉之士瞻鄭邦而知退章

甫翠履之人望閩鄉而歎息詩旣若此筆又如  
之徒以煙墨不言受其驅染紙札無情任其搖  
襖甚矣哉文之橫流一至於此至如近世謝朓  
沈約之詩任昉陸倕之筆斯實文章之冠冕述  
作之楷模張士簡之賦周升逸之辯亦成佳手  
難可復遇文章未墜必有英絕領袖之者非弟  
而誰每欲論之無可與語吾子建一共商摧辯  
茲清濁使如涇渭論茲月旦類彼汝南朱丹旣  
定雌黃有別使夫懷鼠知慙濫竽自耻譬斯袁

經畏見子將同彼盜牛遙羞王烈相慰不見我  
勞如何

答湘東王書

暮春美景風雲韶麗蘭葉堪把沂川可浴弟召  
南寒訟時綴甘棠之陰冀州爲政暫止褰襜之  
務唐景薦大言之賦安汰述連環之辯盡遊翫  
之美致足樂耶吾春初卧疾極成委獎雖西山  
白鹿懼不能瘡子預赤丸尙憂未振高卧六安  
每思扁鵲之間靜然四屋念絕修都之香豈望  
文殊之來獨思吳客之辨屬以皇上慈被率土  
茸露聿宣鳴銀鼓於寶坊轉金輪於香地法雷

驚夢慧日暉朝道俗輟湊遠邇畢集聽衆白黑  
日可兩三萬獨以疾障致隔聞道豈止楊僕有  
關外之傷周南起留滯之恨第十三日始侍法  
筵所以君長近還未堪執筆敬祖前邁裁欲勝  
衣每自念此愍然失慮江之遠矣寤寐相思每  
得弟書輒疴遣疾尋別有信此無所伸

又答湘東王書

十八日晚於華林閣外省中得弟九月一日書甚慰懸想秋節淒清比如常也州事多少無足疲勞濠梁之氣不異恒日差盡怡悅特有樂事游士文賓比得談賞終宴追隨何如近日注漢功夫轉有次第思見此書有甚饑愁吾蒙受苦薩禁戒遙預大士此十二日便於東城私幘十七日旦早入寶雲壁門照日銅龍吐霧紅泉含影青蓮吐芳法侶成群金山滿座身心快樂得



未曾有昨旦平等寺法會中後無礙受持天儀  
臨席睟容親證拜伏雖多疲勞頓遣剃頂之時  
此心特至心口自謀併欲剪落無疑馬援遣蝨  
之談不辭應氏赤壺之諷僧璉典議不異昔日  
竟日間璉殊均子路探鉤取名名曰因理皇情  
印可今便奉行昨晡後方還所住徐摘庾吾羌  
恒日夕鏡遠在直時來左右但不得個儻殊異  
盤下之時稍習節文欲避酒泉之職尹王相去  
既爾伸欵對臨汝侯比多屬疾來宮小稀其間

信使差得其簡曄兼詹事陳爲洗馬時伸話言  
數語論辯句之侯東撫復成離濶衡山九疑尋  
應引邁臨岐有歎望水興嗟但吾自至都已來  
意志忽悅雖開口而笑不得真樂不復飲酒垂  
二十旬次公醒狂自成無理知耆艾數信述吾  
經過適憶途遵江夏路出西浮日月易來已涉  
秋暮而韋述有長沮之弊必笑之災術異葛仙  
形均荀序弟復資其糧餼特爲經營轉禍爲福  
事均比叟分別已來每增慨憶歎因月積想逐

時旋每有西郵事同撫旌相見之期未知何月  
瞻言玉嶺靜對金關懷勞之深未常弭歇善自  
保惜及此不多綱疏

答湘東王上王羲之書

試筆成文臨池染墨疏密俱巧真草皆得似望  
城扉如瞻星石不營雲飛之散何待曲辱之丹  
方當奉彼篋中置之帳裏乍楷桐鉤時懸欹案  
戢意之深良不能已

卷一  
答湘東王慶州牧書

雖心慕子文申威涿郡意存士雅慷慨臨江而  
不能遂封狼居之山永空幕南之地逐北聊城  
追奔瀚海必欲卷綬避賢辭病収迹

答南平嗣王餉舞簾書

濯龍之木文剡飾壇淮南之臺紫羅爲薦未若  
五離九折出桃枝之翠筍綺爛霞舒製雲母之  
脩竹南湘點淚喻也未奇東官赤花擬之非妙

答定襄侯餉卧簟書

筠簟多品篠簟雜名校色比奇獨此爲貴自含  
蒼紫似久暴於柯亭乍舒黝素若屢霑於湖水  
三伏餘炎九折成用便可旅食南館高卧北窓

與廣信侯述聽講事書

王白仰承比往開善聽講涅槃縱賞山中游心  
人外青松白露處處可悅奇峰恠石極目忘歸  
加以法水晨流天華夜落往而忘反有會昔言  
王牽物從務無由獨往仰此高蹤寸心如結謹  
白

與廣信侯重述內典書

王白潤絕音旨每用延結風嚴寒勁願比怡和  
伏承淨名法席親承金口辭珍鹿苑理愜鷲山



微密秘藏於斯旣隆莊嚴道場自茲彌闡豈止  
心燈夜炳亦乃意蕊晨飛況兄慧思弘明本長  
內教今階十善之車開八正之路流般若之水  
洗意識之塵以此春翹方爲秋實王每憶華林  
勝集亦叨末位終朝竟夜沐浴妙言至於席罷  
日餘遐休傍省攜手登臨兼展談笑仰望九層  
俯窺百尺金池動月玉樹含風當於此時足稱  
法樂今卷帷之部乘傳一隅聞慧雨滂流喜躍  
充適徒挹懸河無仰承稟空無所有不瑩情靈

緣癡有愛自嗟難拔兼下車已來義言蓋少舊  
憶已盡新解未餐旣慙口誦復非心辯永謝瀉  
瓶終慙染艷是則慈雲旣擁智海亦深影末波  
餘希時灑拂但睽違轉積興言盈臉願加敬納  
言不宣意謹白

廣信侯答晉安王書附

廣信縣開國侯蕭映惶恐死罪信至奉誨清  
言兼紙文彩巨麗慰喻綢繆比日寒霜慘切  
伏願興居和念民富重殷無過仰損下官智

昏識闇學淺人凡遂得擁卷璇階親奉教義  
耳餐甘露心承制說天恩淵深叡情廣奧三  
明一鑒釋滯義於久迷四辯旣陳闡難思而  
頓解豈漢皇夢迹而梵響復弘雖晉帝畱心  
而微言始見每至夕趨瓊筵晨登朱陛不曾  
不憶芳林勝集玄圃法座殿下曳舄寶雲或  
從容而問道拖裾博望乍折角而解頤于時  
謬齒末筵預聞清論親奉話言數陪顏色至  
於今者講席殿下限同分陝謬頒天獎猶及

下官誰不欽仁寧無戀德傾心東注恒以係  
仰爲先下官蒙蔽久已仰慕雖聞妙義愚心  
難終方欲馳驚紛鄉訪疑下席忽逢令旨垂  
覓波餘尋讀戰惶俯仰慙慙庶爲恩諱少泰  
下情正當慈雲智海翻以仰屬謝瓶慙毳寶  
歸庸菲下官惑緣旣積塵累未消近攝衛爭  
方遂中途感疾不得餐承究竟闢開末品徒  
自尅責終關緣運不審比日何以怡神披閱  
儒史無乃損愈下官每訪西郵僉餐令德仰

承觀矚於章華之上或聽訟於甘棠之下未  
嘗不文翰紛綸終朝不息清論玄談夜分乃  
寐泰華之客登座右而升堂秋實之賓應虛  
左而入室文宗義府於焉總萃惟此最樂實  
驗茲辰下官昔游梁苑山蒙眷顧今者獨隔  
清顏久睽接仰傾心已結興言涕歎惟冀音  
旨時錫沾及伏願珍重尋更下承曲奉恩誨  
用深銘荷映苑罪苑罪

答新渝侯和詩書

垂示三首風雲吐於行間珠玉生於字裏跨躡  
曹左舍超潘陸雙鬢尚光風流已絕九梁插花  
步搖爲古高樓懷怨結眉表色長門下泣破粉  
成痕復有影裏細腰令與真類鏡中好面還將  
畫等此皆性情卓絕新致英奇故知吹簫入秦  
方識來鳳之巧鳴瑟向趙始覩駐雲之曲手持  
口誦喜荷交并也

誠當陽公大心書

汝年時尚幼所闕者學可久可大其惟學歟所以孔丘言吾嘗終日不食終夜不寢以思無益不如學也若使牆面而立沐猴而冠吾所不取立身之道與文章異立身先須謹重文章且須放蕩

答張纘謝示集書

綱好文章於今二十五載矣竊嘗論之日月參  
辰火龍黼黻尚且著於玄象章乎人事而况文  
辭可止詠歌可輟乎不爲壯夫揚雄實小言破  
道非謂君子曹植亦小辯破言論之科刑罪在  
不赦至如春庭樂景轉蕙承風秋雨且晴檐梧  
初下浮雲生野明月入樓時命親賓乍動嚴駕  
車渠屢酌鸚鵡驟傾伊昔三邊久留四戰胡霧  
連天征旗拂日時聞塢笛遙聽塞笳或鄉思悽



然或雄心憤薄是以沈吟短翰補綴庸音寓目  
寫心因事而作

與蕭臨川書

零雨送秋輕寒迎節江楓曉落林葉初黃登舟  
已積殊足勞止解維金闕定在何日八區內侍  
厭直御史之廬九棘外府且息官曹之務應分  
竹南川剖符千里但黑水初旋未申十千之飲  
桂宮旣啓復垂雙闕之宴文雅縱橫卽事分阻  
清夜西園眇然未尅想征艫而結歎望桂席而  
霑衿若使肌農書疏脫還鄴下河南口占儻歸  
鄉里必遲青泥之封且覲朱明之詩白雲在天

梁簡文帝集

卷十

十五

蒼波無極瞻之岐路眷慨良深  
慶護波潮敬勗  
光彩

與劉孝綽書

執別灞漦嗣音阻濶合璧不停旋灰屢徙玉霜  
夜下旅鴈晨飛想涼燠得宜時候無爽旣官寺  
務煩簿領殷湊等張釋之條理同于公之明察  
雕龍之才本傳靈虺之譽自高頗得暇逸於篇  
章從容於文諷頃擁旄西邁載離寒暑曉河未  
落拂桂棹而先征夕鳥歸林懸孤帆而未息足  
使邊心憤薄鄉思遄迴但離濶已久載勞寤寐  
佇聞還驛以慰相思

答蕭子雲上飛白書屏風書

得所送飛白書縑屏風十牒冠六書而獨美超  
二篆而擅竒乍寫星區特圖鳥翅非觀觸石已  
覺雲飛豈待金璫便觀蟬翼聞諸衣帛前哲未  
巧懸彼帳中昔賢掩色

答徐摛書

山濤有言東宮養德而已但今與古殊時有監撫之務竟不能黜邪進善少取國章獻可替不仰禪聖政以此慙惶無忘夕惕驅馳五嶺在戎十年險阻艱難備更之矣觀夫全軀具臣刀筆小吏未嘗識山川之形勢介冑之勤勞細民之疾苦風俗之嗜好高閣之閒可來高門之地徒重玉饌羅前黃金在握浞訾栗斯容與自憇亦復言義軒以來一人而已使人見此良足長嘆

與魏南荊州刺史李志書

卿門世奕葉中州舊族自金天失馭帝鼎南遷  
衣冠播越不及俱邁豈可屈志羶戎久淪胡壤  
今皇師外掃天鉞四臨海蕩電飛雲蒸雨合所  
推所尅是卿之具聞也且僞國沸騰四方幅裂  
主虐臣姦牝雞亂政若能早識事機翻歸有道  
豈直圖形長樂刻像鐘鼎時事易差相思勉厲  
但明月暗投昔人爲誠鄰藩贈藥有可虛懷密  
驛輕郵側望歸簡

與智琰法師書

五翳消空韶光表節百華異色結綵成春道體  
何如恒清宜也對玩清虛旣在風雲之表游心  
入理差多定慧之樂弟子俗務紛紜勞倦特深  
睠然北嶺欽賢已積會遇之期庶必可儻有緣  
之儔事等饑渴佇望來儀一日三歲想思弘利  
益理當無爽指遣此信無述寸衿綱和南

又

旦來雨氣殊有初寒攝衛已久轉得其力雖他



方法界略息化緣祇洹之裏恒有晤對眷佇之  
深無時不積久因倩師頌述方寸不知巧笑之  
僧頗爲津及不耳前昨已來徵事義聚龍象畢  
同應供皆集慧炬開心甘露入頂聞之善謔特  
盡歡怡想味之懷轉復無極昔幼年經聞制書  
受道日淺北面未深雖異禪那事同華水今段  
西下特蓄本心訪理質疑屬在明德不謂般若  
留難現疾未瘳問津無地歎恨何已伏承輿駕  
尋幸伽藍冀於此時得一覲止辯論青豆之房

遣惑赤花之舍追往年之宿眷述卽日之寸心  
此事必期冀非爽指遣茲承問佇有還書綱和  
南

明道澄法師亡書

省啓承尊師昨夜涅槃甚深悲怛法師志業淹  
明道風淳素戒珠瑩淨福翼該圓加以識見冥  
通心解遠察記落雨而必然稱黑牛而匪謬服  
膺者無遠近蒙益者兼道俗弟子自言旋京輦  
便伸結緣豈謂一息不追奄至乎此然勝業本  
深智刀久利必應游神實地騰跡淨天但語其  
乳池啓殯香棺入室不入空心于何不慟但如  
來降生之迹因此而入泥洹正當其生住滅靡

有定相先聖後賢何其形響推校因緣未始有  
例上人等並在三歲積始終稟道宜應共相策  
勉弘遵舊業使道場無斷利益不墜所祿物輒  
如法供養奈何奈何

梁簡文帝御製集卷之十一

梁太宗簡文皇帝蕭綱著

序

莊嚴旻法師成實論義疏序

夫事秉文辭理通氣象涉之者尚迷求之者或  
躓是以問玄經於揚子且云不習奏古樂於文  
侯猶稱則睡曆校清臺壽王之課不密氣現斗  
牛南昌之地或爽況乎慧門深邃入之者固希  
法海波瀾汎之者未易自使河濟混淆魔塵紛

糾皎皎毒霜童童苦樹善田之苗不吐意華之  
彩詎發無常之樓互起暗室之火無暉是以餐  
蜜挫糟俱珍異論持牛卧棘競起邪宗自佛日  
團空正流蕩垢手擎四鉢始乎鹿園之教身卧  
雙林終於象喻之說含生弗等開塞之義因機  
感受不同淺深之言或異處處散說本應根緣  
有不次第各隨群品金棺已掩旃檀之炭無追  
乳池且涸白蠟之灰斯盡迦葉入定歡喜智滅  
末地之報已終優波之身且謝於是五部橫流

八乾起執尋源旣舛取著尤別四相乃無常之  
刀三聚爲苦家之質習續不斷稱爲集諦無爲  
有體介然可求等智能斷羅漢猶退豈啻千里  
之舛義起毫釐三豕之書謬符晉史北轅趨郢  
木末舉葉譬乎服子論丘利害不識膠柱鳴瑟  
燥濕無變自佛滅之後八百餘年中天竺國婆  
羅門子名訶梨跋摩梁云師子鎧四種圍陀在  
家必習三品慧藏入道彌通師事達磨沙門事  
均反啓於是歎微言之已絕傷頽風之不振抗

言動論以朱紫爲先發意吐詞必涇渭由已於  
是標撮領會商榷異端刪夷浮詭搜聚貞實造  
百有二品以爲斯論成則據文實則明理舉成  
對壞稱實形虛欲令毘曇外道二途皆廢如來  
論主兩理兼興若夫龍樹馬鳴止筌大教旃延  
法勝縈縛小乘兼而總之無踰此說故華氏之  
王於茲頂戴樓佉外道結舌無辭百流異出同  
歸一海萬義區分總乎成實豈止鼓腹涅槃旌  
靡轍亂雞鳴真諦喪精掩色多歷年所復寡英



才粵我大梁炎圖啓運皇帝含天包地之德春  
生夏長之仁以本誓願率化斯土梵輪常轉三  
寶現前甘露聿宣四部無厭有莊嚴旻法師羽  
儀鸞鳳負揭光景深以通志神以知來其跡同  
凡其源莫測故以心包四忍行合三空慧比文  
殊玄如善吉總持均阿難之德樂說有富樓之  
功思媚我皇起予正法宜弘此論大盛乎京師  
負笈爭趨懷鉛來遠無勞冠軍之勢自領衛客  
固有華陰之德人歸成市擬議舍衛超邁泗涖

西關自耻南宮不競湘官寺智禱筆札之功不殊法汰之報安石清辯之妙何止道林之析子猷凡如千卷勒成一部法師大漸深相付囑豈直田生之亡獨卧施離之手馬公之學方由鄭氏而陳其義云

昭明太子集序

竊以文之爲義大哉遠矣故孔稱性道堯曰欽  
明武有來商之功虞有格苗之德故易曰觀乎  
天文以察時變觀乎人文以化成天下是以含  
精吐景六衛九光之度方珠喻龍南樞北陵之  
采此之謂天文文籍生書契作詠歌起賦頌興  
成孝敬於人倫移風俗于王政道綿乎八極理  
浹乎九垓贊動神明雍熙鍾石此之謂人文若  
夫體天經而總文緯揭日月而諧律呂者其在

茲乎昭明太子懸明離之極照履得一之休徵  
曰孝與仁窮神盡聖豐下表異垂髮應期若夫  
嵩霍之峻無以方其高滄溟之深不能比其大  
二曜朏蝕而凝明弗虧四氣猶爽而履信或一  
言出知乎微行立彰乎遠湛然玄默巍乎莊敬  
居身以約在滿必冲九德之保無以喻其審諭  
六行之傳豈可語其拾遺叔譽知窮師曠心服  
行一物而三善固無得稱焉至如翠蕤晨興斑  
輪曉驚胡香翼蓋葆吹從風問安寢門之外視

廢東廂之側三朝有則一日弗虧恭承宸扆  
贊顏色化闕梓於商庭旣欣拜夢望直城而結  
軌有悅皇心此一德也地德褰帷天雞掩色構  
傾椒殿沴結堯門水漿不入圭溢罕進喪過乎  
哀毀幾乎滅池綽旣啓探擗標之慟陵園斯踐  
震中路之號率由至要之道以爲生民之則固  
已事彰朱草理感圖雲此二德也垂慈豈弟篤  
此棠棣善誘無倦誨人弗窮躬履禮教俯示楷  
模群藩戾止流連於終讌下國遠征殷勤於翰

墨降明兩之尊匹姜肱之同被紆作貳之重弘  
臨菑而共館此三德也好賢愛善甄德與能曲  
閣命賓雙闕延士剖美玉於荆山求明珠於枯  
斧賞無繆實舉不失才巖穴知歸屠釣棄業左  
右正人巨僚端士丹轂交景長在鶴關之內花  
綬成行恒陪畫堂之裏雍容河曲並當今之領  
袖侍從埜塲信一時之俊傑豈假問謝鯤於溫  
嶠謀黃綺於張良此四德也皇上垂拱巖廊積  
成庶務式總萬幾副是監撫山依播彩地立少

陽物無隱情人服睿聖此五德也罰慎其濫書  
有作則勝殘去殺孔著明文任刑逞威倣疵淳  
化終食不違理符道德故假約法於關中秦民  
胥悅咸嚴刑於關下漢后流名是以遠鑒前史  
垂恩獄犴仁同泣罪幽比推溝玉科歸理遣之  
恩金條垂好生之德黔首齊民亭育含養咸欣  
然不知所以然此六德也梧丘之首魂沉而靡  
託射聲之鬼曝骨而無歸起掩骼之慈被錫櫨  
之澤若使驄馬知歸感埋金於地下書生雖殞

尚飛被於天上恩均西伯仁同姬祖此七德也  
玄冥戒節沍陰在歲雪號千里冰重三尺炎鑪  
吐色豐貂在御留上人之重愍終窶之氓發於  
篇藻形乎造次輟宴心歡矜容動色嘆陋巷之  
無褐嗟負薪之屢亡發私藏之銅鳧散垣下之  
玉粒施周澤洽無幽不普衛命之人不告而足  
受惠之家飡恩之士咸謂櫟陽之金自空而墮  
南陽之粟自野而生此八德也陽河淥水奇音  
妙曲遏雲繁手仰秣來風靡悅于胸襟非關於



懷抱事等棄琴理均放鄭豈同魏爾作歌於長  
笛終噪漢貳託賦於洞簫此九德也恠寶竒踪  
不留於器服仙珠玉玦無取於浮玩土木無梯  
劇宮殿靡磨礪此十德也承華廣濶肅成且罄  
秋光洞入春花洒樹名僧結侶長裾總集吐納  
名理從容持論五稱旣辯九言斯洽如觀巨海  
如見游龍令羅折談名儒稱爽無勞擁經八卷  
豈假羊車詣門此十一德也研精博學手不釋  
卷含芳腴於襟抱揚華綺於心極韋編三絕豈

直爻象起先五鼓非直甲夜而歆案無休書幌  
密倦此十二德也群玉名記洛陽素簡西周東  
觀之遺文刑名墨儒之肯要莫不殫茲聞見竭  
彼綈緇總括奇異徵求遺逸命謁者之使置籛  
金之賞惠子五車方茲無以比文終所收形此  
不能匹此十三德也借書治本遠紀齊攸一見  
自書聞之闕澤事唯列國義止通人未有隆貴  
紆尊躬刊手掇高明斯辨已亥無違有識 風  
長正魚魯此十四德也至於登高體物展詩言

志金銑玉徽霞章霧密致深黃竹文冠綠槐擁  
引解騷包羅比興銘及盤盂贊通圖象七高愈  
疾之肯表有殊健之則碑窮典正每出則車馬  
盈衢議無失體纔成則列藩擊缶近逐情深言  
隨手變麗而不滯

臨安公主集序

四德之美戚里仰以爲風七行之奇濯龍規以  
爲則若夫託勾陳之貴出玉臺之尊風儀開潤  
神姿照朗愛敬之道風彰柔嫺之才必備鳳桐  
遐遠清管遼亮湘川寂寞淚篠葳蕤北渚之句  
尚傳仙靈之典不泯况復文同積玉韻比風飛  
謹求散逸貽厥於後

馬樂譜序

馬樂爲用雖非遠法近代相傳稍已成藝鄧麓  
縈魏后之廷武而猶質種馬入丹陽之寺雄而  
未巧聊以餘暇復撰斯法搜採抑揚斟酌煩簡  
至春亭落景秋臯晚靜嚴霜盡降密雲初晴纖  
驅沃若天馬半漢盼金精而轉態交流汗血凌  
連錢而息影不畏衣香雕衢與白刃同暉翠牀  
與紅塵俱動足使武夫憤氣觀者衝冠巴童留  
玩不待輕舟之楫越女踟躕無假如臯之箭

三日曲水詩序

竊以周成洛邑自流水以禊除晉集華林同文  
軌而高宴莫不禮具義舉存矩重規昭動神明  
雍熙鍾石者也皇太子生知上德英明在躬智  
湛靈珠辨均河注騰茂實於三善振嘉聲於八  
區是節也上巳屬辰餘萌達壤倉庚應律女夷  
司候爾乃分階樹羽䟽泉汎爵蘭觴沿泝蕙肴  
來往賓儀式序盛德有容吹竽孫枝聲流嶰谷  
舞艷七盤歌新六變遊雲駐綵仙鶴來儀都人

野老雲集霧會結軫方衢飛軒照日

八關齋制序

夫五宅易昏四流不汨業動心風情漂愛啖自  
非識達真空照靈珠於難曉神緣妙境蓄慈根  
於未化無以却此四魔登茲十善今列筵肅靜  
高宇閒邃香吐六銖煙浮五色目對金容耳餐  
玉韻無容使情緣異染形不肅恭類倚於鴛宮  
同力於羊角宜制此心馳祛斯醉象立制如左  
咸勉聽思謹條八關齋制如左睡眠籌至不覺  
罰禮二十拜擎香鑪聽經三契一出不請刺罰



禮十拜二出過三契經不還罰禮十拜三鄰座  
睡眠維那至而不語者罰禮十拜四鄰座睡眠  
私相容隱不語維那者罰禮十拜五維那不動  
聽察有犯制者不卽糾舉爲衆座所發覺者維  
那罰禮二十拜擎香鑪聽經三契六白黑維那  
更相糾察若有阿隱罰禮二十拜七聽經契終  
有不唱讚者罰禮十拜八請刺無次第罰禮十  
拜九請刺白黑刺有誤者罰禮十拜十

自序

有梁正士蘭陵蕭世縝立身行邑終始如一風  
雨如晦雞鳴不已弗欺暗室豈沈三光數至於  
此命也如何

論

勸醫論

勸醫曰天地之中惟人最靈人之所重莫過於  
命雖脩短有分天壽懸天然而寒暑反常嗜欲  
乖節故瘡寒痼暑致斃不同伐性爛腸摧年匪  
一極斯之要實在良方故祇域醫王明於釋典  
如大師乃以醫王爲號以如來能煩惱病祇能  
治四大乖爲故亦有騷人之詠彭城秦國之稱  
和緩季梁之遇盧氏號子之值越人爰至父視

飛仙長生妙道猶變六一於金液改三七於銀  
九蓄玉匣之秘研紫書之奧桃膠何是北斗靡  
遞其形金漿非遠明珠還匝其價能使業門之  
下鼓簪獨傳雍祀之飭簫聲猶在周禮疾醫掌  
萬民之疾凡民之有病者分而治之歲終則各  
書其所治而入於醫師知其愈與不愈以爲後  
法之戒也正如研精玄理考覈儒宗盡日清談  
終夜講習始學則負墟尚諛積功則爲師乃著  
日就月將方稱碩學專經之後猶須劇談網羅

彈基論

觀夫模穹蒼而挺質寫博厚而成形峙五岳而  
標奇停四海而爲量協日月之數應律呂之期  
總玄黃之武畧校孫吳之應變語其用心壯哉  
之戲也爾乃觀壯士之出師望兵戎之式道上  
昇則搏翼穹天赴下則建瓴高屋乘危則棧山  
航海歷險則束馬懸車完五憶霸國之勲全六  
想陳平之智八反均高陽之數四角思漢后之  
歌飛瓦同晉侯之琴徘徊異鄴中之輦牽牛覺

乘槎之來織女擬雲駢之去故古人或言之禮  
樂或比之仁讓或喻以脩身或齊諸道德良有  
以也